

**Napparsimasut illersuisuannik pilersitsinissamut Inatsisissatut siunnersuuteqaqqullugit
Naalackersuisutpeqquneqarnissaannik Inatsisartut aalajangiiffigisassaattut siunnersuut.**
(Siunnersuuteqartoq: Siumup gruppia)

Siumukkut siunnersuutaannut qujanaq.

Una siunnersuut innuttaasunit aatsaat oqaatsitigut tusarneqalinngilaq. Tassami Siumoqatigisimasatta una siunnersuut oqaasinngorlugu politikerinut, tusagassiutitigut aammalu innuttaasunik ataatsimiisitsisarnikkut apuuttareernikuuaa, aammalu iliuuseqartoqartanngimmat innuttaasunik 1609-nik atsiortitsinikuuvoq, siunertap pingaassusaa pisariaqassusaalu pingaartingaaramiuk taamak iliorpoq. Tunniunnissaanullu angumersinngitsoorpoq, uiatali meeraasalu suliaq unitsiinnarnagu, taamanikkut 2020-mi Peqqinnermut Naalackersuisuusumut atsiortnerit sinnerlugu apuuppaat. Taamaammat massakkut Siumumit maanna Siumoqatigisimasarput sinnerlugu una qaqinneqarluni.

Siunnersuutip qaqinneqarnera pissusissamisoorpoq, sulimi napparsimasut atugaat pitsanngortinneqarsimanngimmat. Naalackersuisummi akissuteqaataanni allaqqavoq, politikikkut suliassani suliassatut qulequttatut ilaasarsimanngitsoq. Puigorneqartoqqasarsimarpasilluni.

Issaannaq allagarsivunga, napparsimasut atukkaminnik pitsanngortitserusullutik iliuuseqarsimagaluarnertik annilaangatinneqarnermik kinguneqarsimammat uannut apuussaartut. Taanna Peqqinnermut Naalackersuisumut Peqqinnissamullu Ataatsimiititaliamullu ingerlateqqinnikuuara. Naalackersuisumiilli akissuteqaat pissusissamisoortutut isiginngilara, tassami piffik pineqartoq imminut illersorluni akissuteqarsimammat, napparsimasulli ataasinnguamilluunniit paasiniaaffigineqaratik. Tassa Naalackersuisoqarfik annermik iliuuseqanngilaq.

Ataatsimiititaliali naluara allagaq suliassamittut pillugu akorsimaneraat.

Tassuuna aqqissuusaaernerput innuttaasuminut eqartumik pinera takussutissiiginnarpoq, naak illersortissaat? Naak saaffissaat? Uanga Inatsisartutut ataasiakkaatut ingerlaannaq iliuuseqarsinnaanngilanga, ingerlateqqippara, kinguneqartinneqanngilarli, piffik pineqartoq kisimi aperineqarpoq. Aqqissuusaaaneq imminut illersorpoq, soorunami. Pingaarnepaalli ullumikkoqqissaq illersorneqaratik. Illersorneqassamaarnatillu. Aali toqqissisimanngitsut. Napparsimasut. Eqqarsarnaq. Iliuusissaaleqinaq.

Ullutsinni pisinnaatitaaffinnik qulakkeerinnittoqarnerinnik taakkuninngalu inuiaqatigiinnut paasititsiniaasartut suliaqartuartarput. Politikikkikkulli tamanna pikkorluffiguarparput, pisinnaatitaaffinnik qulakkeerinninnissaq. Napparsimasut aamma pisinnaatitaaffeqaraluarput, tamannali ulloq manna tikillugu pitsaanerpaamik qulakkiinngilarput. Kikkummi suliassaq taanna kivissagamikku? Kikkut nakkutilliisuussagamik? Innuttaasut napparsimasut kisimik? Taakku nukissaaleqereerput. Nalunngilarpummi pisorta qarfinnut saaffiginnittarneq amerlasuutigut ilungersunartartoq, tamakkiisumillu ikorfartorneqartutut misigisimaneq pineqarneq ajorluni.

Nappaat ajorluinnaraangat immaqaluunniit immikkuullarikkaangat, annertuumillu misissugassaangaangat Nunatta qulakkeersinnaasannimmagu Danmarkimut misissugassat aallartittaraagut. Danmarkimut aallartikkaangatsigit qaavatigut qanigisamik peqateqarsinnaanerannik ajornasaartitsisaraagut. Kinami Peqqissartut Angerlarsimavianiinnikuunngitsup atukkat naammaginangeqisut tappiiffigai? Sivisuuminguna Peqqissartut Angerlarsimaffianniilluni aaqqikkusutat arlaqartaqisut, qassimmita Naalackersuisut taakani oqalugiarfigitereeraluarpat? Pissutsilli pitsanngungaarsimanngitsut allakkiami uannut apuunneqarsimasumi takussutissiipput. Naboqa, Savalimmiormiut Peqqissartut Illuat, inuppalaangaarami, nerisassaatingaaramik usornaannartarpulluunniit. Napparsimasut oqaaseqartartoqalerpat napparsimasut atugaat pitsanngortinneqarsinnaasut qularnanngilluinnarpoq.

Naalackersuisut suliniutigisaat unaavoq:

“Peqqinnissaq pillugu ataatsimiititaliarsuup innersuussutai naapertorlugit, peqqinnissaqarfiup pingaarnertut aaqqissusaanerata ilusissaata nutaap piareersarlugu suliarineqarnera Naalackersuisut aallartissimavaat. Sulinermi tassani immikkoortoq 2-mi, innuttaasut katsorsartittullu isummersuutaat immikkoortutut qitiusutut ilanngunneqassapput, matumani innuttaasunut peqqinnissaqarfimmut attaveqartunut pitsanngorsaatilik pilersitsinissaq siunertarlugu.”

Pisoqartillugu suleqatigiissitaliortarneq immi ajunngikkaluarpoq, kisianni uani tamanna immi naammangitsoq Siumumit isumaqarpugut. Ataqaatigiissaariunissaq pisariaqarlunnarmat. Ataasiaannarluni innuttaasunik napparsimasunillu misissuinerup ajornartorsiutinik aaqqiisinaanera qularigatsigu. Taamaattumillu Naalackersuisut suliaat qujarukkaluarlugu suli napparsimasut oqaaseqartartoqarnissaat Siumumit angorusoqaarput.

Oqaaseqartartussap suliassai, siunnersuutigineqartup saniatigut, ilaatigut suussanersut Siumumiit uku taarusuppagut:

- Ukiumoortumik nalunaarusiorneq: suut aqqusaarneqarpat, kisitsisitalersorlugit, paasitussitalersorlugit, taakku politikerinut tunniunneqartassallutik tunngavissanngorlutik aaliangersaanissamat. Tassami pinermiit pinermut suleqatigiissitaliortuarnissaq

naammanngilaq, ataqatigiissaarinerunngimmat. Oqaaseqartartulli ataqatigiissaarineq qulakkiissammagu

- Nappaatillit saaffigisinnaasaat, meeqqat, utoqqaat, innarluutillillu oqaaseqartartuisut atuuffilik
- Nappaatinut ilisimaneqanngitsunut aqqissuussaannermut ersarissaasusaaq, nappaatillit qanoq inissisimappat, inissisimanageranik paasissutissiinerit, aaqqiiffiqineqartussanik siunnersuusiorneq
- Napparsimaveqarfiup iluani suleriaatsinik allanngortitsinissanik qulaajaasimanerup kingunerisaanik siunnersuutit
- Tassa napparsimasut atugaannik, napparsimaveqarfiup suleriaaserisaanik, kisitsisinik ersarissaaneq (soorlu kræftertut ukiumut qassiuppat, qassit aniguiuppat, qassit aniguingillat) oqaaseqartartup susassaqaqfigisassaani ilaatigut suliaassaasapput.

Siumumit napparsimasut oqaaseqartartussaannik peqalernissaaq pingaarteqaarput. Kisitsisimmi takutippaat pitsanngorsaasoqaraluaq kisitsisit nikerianngitsut. Inuiaqatigiulluta peqqinnissaqarfippat aamma pitsaasumut ikiorumallugu innuttaasut tusarneqarusupput, saaffissaqartuarusupput, taamaalillunimi assiliaq aneq, aaqqiinissarlu pitsaasoq ingerlalertulissagaluarmat.

Taamatut oqaaseqarluta siunnersuut Peqqinnissamut Ataatsimiititaliamut ingerlateqqipparput, neriutugalugu innuttaasugut napparsimasut, taakkununngalu qanigisaasut, kiisami piffissami ungasippallaanngitsumi saaffissaqalissasut. Taakkununngaannarmi iluaqutaassanngimmat, peqqinnissaqarfippat tusiareeqisoq, innuttaasunit aamma pitsanngorfiusussanik tikkuussiffiqineqartalissammat, taamaalilluta aqqissuussaannikkut aammalu innuttaasunut pitsaanerpaaq anguneqaleriartuaarneqalissammat.

Qujanaq.

Oqaaseqartoq, Najaaraq Møller, Siumut